

L'é se n jit n tòch de istoria de l'alpinism fascian

Lino Trottner da Vich l'é stat gran amich de alpinisc de nonzech e l'à lascià sia pedies su n muie de vies

N auter toch de istoria de Fascia e soraldut de l'alpinism di ùltime 50 egn se n va dessema a Lino Trottner da Vich, mort la setemèna passèda a Vich. Na mort fora de n bel nia che à lascià tel dolor apede a sia femena, ai doi fies e ai nec, dut l mond de l'alpinism de Fascia, de la scoles de schi e duc i fascegn che l l'aea cognosciù e stimà. Lino Trottner, 73 egn, e de chisc tropes dediché a la crepes, a la pascion per jir semper più en aut anter tera e ciel. Na gran pascion chela de Lino Trottner per la crepes nasciuda a la fin di egn cincanta e jita inant per duta la vita tel segn de n amor zenza fin per la Dolomites e per la rampinèda. Gran amich de n muie de alpinisc, Lino aea



Lino Trottner te n veie retrat tout fora dal liber "Storia dell'alpinismo Fassano" de Dante Colli, ed. 1999

rampeà con Marino Stenico, Donato Zeni tant per recordèr valgun inom de nonzech de l'alpinism de chi egn, ma ence amò con Rino Rizzi, Enrico Pederiva, Bepin Vian, Marco Dal Bianco e amò de etres. N grumon de amisc, alpinisc e maestres de schi a volù ge dèr l'ùltim salut a Lino, alpinist de gran nonzech de Fascia. Anter sia vies, da recordèr la Parete Sud al Piz Ciavazes, la pruma repetizion del Spigol Ovest de Lavaredo, la direttissima De

Francesch ai Mugoni e sacotanta autres che restarà te la istoria de l'alpinism fascian e dolomitan. Dassen con Lino Trottner se n va n toch de istoria de l'alpinism che anchecondi no é più, de n alpinism che fosc aea ence enlouta vèlch contradizion, ma che de segur era manco roinà dai sponsor e dai record de chel de anchecondi. N alpinism romantich, rich de ideèi che ades no é più e che mor con alpinisc desche Lino Trottner da Vich. (dvt)